

neben/zu vollkommener Cur vnnnd heilung derselbigen/ so wol auch anderer Wunden/andere gebührliche mittel mehr angewendet werden/die dann den Medicis vnd erfahrenen Wundarzten wol bekant. Vnd in Summa Summarum/diese Arzney oder Laudanum Opiatum mitigiret, stillet vnd leget alle schmerzen/sie heissen gleich wie sie wollen / darzu hats noch viel mehr tugende/so zu weitleufftig allhie zubeschreiben.

Ufus.

Der gebrauch dieses Laudani Opiati ist / daß man dieser forngedachten formirten Pillen eine auff ein mahl dem Patienten in einem Löffel voll Wein/oder sonst nach gelegenheit der Kranckheit vnd Gebrechen/ in darzu bequemen Wassern eingebe.

Ist der schmerzen oder wehetage sehr groß/ so gib dem Patienten des Abends vmb sechs Uhren/der schwehrtsten Pillen zu fünff oder sechs gran/ eine auff ein mahl/vnd vmb Mitternacht eine Pille von 4. gran/ vnnnd des Morgens zu vier Uhren eine von drey gran schwehr ein.

Würde es aber in solchen Gebrechen / die gar vberaus hefftige grosse schmerzen vnd wehetage hetten vnnnd gefehrlich weren (gleich wie in einer gattung der Wundtsucht das Zucken oder Vnrube in den Wunden genennet/vnnnd sonst in andern auch bißweilen war zu nehmen ist) von hierinn verstendigen nötig geachtet/daß man den Patienten desto balder in Schlaff brechte/mag man in eingebug dieser Arzney/zum andern/dritten/ ja auch wol vierten mahl/kurzere zeit/als jest gemeldet/anwenden/als etwan nach dem ersten mahl nur eine stunde gewartet/ vnd das es den Schlaff noch nit erregte/wiederumb in einer stunde/vnd alsdann zum vierdten mahl wieder in einer stunde/ also forth an gethan/ biß sich der Schlaff erzeiget/ der denn mit dem dritten / oder ja zum lengsten im vierdten mahl gewiß zu kommen pfleget.

Were aber ein Patient gar zu schwach / so gibt man demselbigen nur die helfft des gewichts allwege.

Ein Patient muß sich auff diese eingenommene Arzney im Bette stille sein warm/jedoch nicht zu heiß/nur also daß er es wol erleiden mag/zugedecklet halten/so erfolget ihm gemeiniglich ein harter Schlaff/ der wol fünff/sechs/sieben/oder mehr stunden wehret/ vnd kompt ihm in allem Schlaffen

M m iij

ein